

Tico Croes  
***PERSECUSION DI  
 PROFESIONALNAN ARUBIANO,  
 ALGO VERGONSOSO DI  
 GABINETE ODUBER***

ORANJESTAD(AAN) -- Parlamentario Tico Croes, a duna di conoce cu AVP a tuma nota di e decision di Juez na unda den e caso Michael Nicolaas versus Gobierno cu Juez porfin a reivindica e nomber y honor di Michael Nicolaas, pasobra por corda bon cla cu desde 1990 e Gobierno aki y muy en particular Ministro Nicolaas tabata persigui den un forma nunca visto director di aeropuerto pa razonnan cu ainda no por compronde.

Segun Croes, persecusion cu a tuma forma humiyante pa Nicolaas den sentido cu a saque for di su oficina, a prohibie di drenta bek tereno di aeropuerto, etc. Y esaki no solamente a causa daño na su nomber muy en particular den un pais chikito manera Aruba, pero tambe a ocasiona hopi daño na su salud, manera nos por a compronde.

Pero e persecusion aki di Michael Nicolaas no ta un caso aisla. Por a mire na diferente otro ocasionnan tambe cu diferente profesionalnan, e Gobierno aki desde inicio di su gobernacion na Februari 1989 a cuminsa cu un sorto di rencor contra profesionlanan Arubiano di tal

manera cu no solamente el a pone nan un banda manera a ripara den sector turistico pero tambe esnan cu e no por a pone un banda, simplemente e Gobierno a cuminsa cu un campaña sushi pa dañá nan nomber, nan reputacion y nan honor, pa nan mes saca nan conclusion y retira for di Gobierno.

Por a mira algun casonan cu esaki a tuma lugar, otro casonan cu e profesionalnan Arubiano a keda para ey nan, mientras cu di otro banda ta mira con e Gobierno aki ta trata otro personanan si cu no tin nada di haci cu Aruba den un forma mucho mas mihor, cu AVP no por compronde pa kico e Gobierno aki ta tratando yiunan di tera di e forma aki.

Ta pesey tambe AVP ta contento cu Juez un biaha mas den su sentencia a reivindica e honor, dignidad y reputacion di un profesional Arubiano pa muestra e Gobierno cu su actitud rencoroso ta un actitud cu no solamente ta causa daño na e persona en cuestion pero ta dañá tambe henter e nomber di e profesionalnan Arubiano y ta treciendo tambe hopi sufrimento den e comunidad Arubiano.